



Musica fa negina differenza



Sin www.musik-unterscheidet-nicht.ch saveis vus dar vossa vusch al video da musica che plai il meglier.

■ (anr/sr) Ei drova curascha da registrar in video da musica e mussar quel alla publicitad. Quei cumprova la segunda ediziun dalla campagna dalla Pro Infirmis «Musik unterscheidet nicht – Musik verbindet». Dudisch videos da musica ein vegni inoltra e pren-

dan ussa part dalla concorrenza ch'ei d'anflar silla plattafuorma www.musik-unterscheidet-nicht.ch. Aunc tochen ils 31 d'october 2019 ha il publicum la pussivladad da mirar, tedlar e dar la vusch al video preferiu. Suenten l'emprema ediziun dil 2017 eis ei la segunda concorren-

za da quei gener lantschada dalla Pro Infirmis Grischun. Cun quei messadi porta la Pro Infirmis danovamein il patratg dall'inclusiun ella publicitad.

Far punts cun videos da musica

Cun videos produci a moda semplia duei vegnir fatg punts denter carstgauns cun e senza impediments. Dudisch videos da musica diverteivels ein vegni inoltra. Ina biala mischeida da differentes stils da musica e qualitad. Participonts dall'emprema ediziun, musicists ch'han participau agl event «Das Treffen» ed era novs participonts han seschau perschader dall'idea dalla campagna. Sco la Pro Infirmis scriva en in communicau als mieds da massa ein ils acturs stai unanimamein d'in meini, numnadamein ch'il process da realisar ils videos da musica ed ils inscunters sedai aschia seigien stai silmeins aschi impurtonts sco il resultat sez. Sper il victur dil voting dil publicum elegia ina giuria da personalitads ord politica, economia e cultura ulteriurs treis videos victurs. Sper la reconuschientscha dalla publicitad survegnan ils treis emprems rangai in premi en daners ed il victur principal il cristagl dalla Pro Infirmis 2019.

La surdada dil cristagl dalla Pro Infirmis ei publica ed ha liug ils 27 da november 2019 egl auditori dalla Banca cantunala a Cuera.